

CARTA JA NI NTEE SAN JUDAS APOSTOL NUU NDA NCHIVI CANDIJA

¹Maá nī cúu Judas ñanī Jacobo, de mozo Jesucristo cúu nī. De tēe nī carta yáhá cuēē nūū ndá ndóhó nchivī jā ní ncana maá Tatá ó Yāā Dios, de nī nsāhá yā jā íyó ndoo íyó īī nū nūū yā jā cúu nú nchivī mānī yā jíín. De Jesucristo jíto vāha yā ndá nú nūū jānēhén, sīquī jā yíhí nú ndahá yā.
²De ñúhún inī nī jā ná cúndáhvī cā inī yā ndá nú, de sāhá yā jā coo ndeé coo siī inī nū, de coo manī ndasí yā jíín nú, de ná ndúcuahā cā ndá ñúcuán nūū nū.

Siquī ndá tēe jā stéhēn tūhun stáhvī

(2 Pedro 2.1-17)

³Ñanī mānī, ndasí nī ncuu inī nī jā tee nī carta nūū ndá nú sīquī tūhun jā ní scácu yā ndá ndóhó de saá-ni ndá nduhū. Sochi nī jinī nī jā cánuú cā jā tee nī carta jā sndíhvī inī nī ndá nú tácuā nducú ndeé nú jā má cāsī nchivī ndá tūhun cándíja ó. De tūhun yáhá chi ja nī jēhe yā iin vuelta-ni nūū ndá nchivī maá yā.

⁴Chi sava tēe nī stáhvī dē ndá ndóhó nī nquīvi dē māhñú ndá nú. De ndá tēe ñúcuán chi jondē janahán ja cáhān tutū īī jā tñū tāhvī dē sīquī tiñu sáhá dē. Cúu ndá dē tēe nēhén, chi cáhān dē jā vāha inī Yāā Dios, de jā ñúcuán vātu-ni sáhá dē ndá tiñu nēhén chi mā cuáha yā castigo, cáchi dē. De nduú jétúhún ndija dē Jētoho ō Jesucristo jíín Yāā Dios, jā mátúhún yā-ni cúñáhnú nūū ō.

⁵De mitan chi vísō ja jíín vāha ndá nú, de cúnī nī jā nandacu nī nūū nū nāsa nī nsāhá maá Jētoho ō. Chi nī scácu yā nchivī Israel janahán, nī nchindeé yā ji jā ní jinu ji inī ñuū tátū Egipto cuāhān ji. De vísō súcuán de cuéé cā de nī snāā yā sava ji jāá nduú ní ncándíja.

⁶De suni nūcūhun inī nū sīquī ndá ángel yā jā ní sndóo tiñu ndíso, de nī sndóo nūū ní ndeē andiví. De Yāā Dios nī nchindasī yā, de ndétu ndá jondē quenda quīvī cāhnú jā sáhá ndāā yā tiñu. De núhñi jíín cadena, de ndeē ní cáni nūū cūnú nūū neē.

⁷De suni nī sndóho yā nchivī ñuū Sodoma jíín ñuū Gomorra jíín sava cā ñuū jā ní iyo ñatin, chi suni nī nsāhá nēhén ji tá cúu nūū ní nsāhá ndá

ángel ñúcuán jondē janahán cā. De ndá máá ji nī jica ndiī ji de nī nsāhá ji ndācá cuāchi néhén ndasí. De nī nīhīn ji castigo ñuhūn jā cáyū nīí cání, de súcuán cúu ji ejemplo nūū ndihi nchivī.

⁸De ndá tēe stáhvī jā ní nquīvi māhñú ndá nú, vísō jínī dē jā súcuán nī nsāhá yā, de jáni cāhá inī dē, de sáhá téhén dē yiqui cúñu dē, de squéne yichī dē ndá tēe jā ndácu tiñu maá Jētohō ō, de cāhān néhén dē sīquī ndá ángel jā cúñáhnú nūū sūcún.

⁹De nsūú súcuán ní nsāhá ángel Miguel, vísō ángel cúñáhnú cā cúu yā. Chi nduú ní ncāhān nāvāha yā de nī nduú ní ndácunehen yā cuāchi sīquī tāchī cúñáhnú tá nī nsāsáhán táhán yā jín tāchī jā sīquī yiqui cúñu Moisés tá nī jihī dē. Chi suha-ni nī ncāhān yā: Maá Yāa Dios, Yāa cúu Jētohō ō, cuxeēn yā nūū nū, ncachī Miguel.

¹⁰Sochi ndá tēe stáhvī yáhá chi cāhān néhén dē sīquī ndācá jāá nduú jícūhun inī dē. De ndācá modo jā névāha dē sīquī jā súcuán cáá dē, tá cúu quiti yúcú jā súcuán cáá tī, suu ñúcuán sáhá jā tānū tāhvī dē.

¹¹Nācā xēen cundoho ndá dē túsaá, chi nduú jétáhvī dē Yāa Dios, tá cúu nūū nduú ní jétáhvī Caín. De sīquī jā cúni ndá dē nīhīn dē xūhún de stéhén dē tūhun stáhvī, tá cúu nūū ní nsāhá Balaam. De tānū tāhvī ndá dē, tá cúu nūū ní ndoho Coré, chi nī jihī dē sīquī jā ní ncunīhīn inī dē.

¹²Ndá tēe yáhá tá ndútútú dē jín ndá nú jā yáji mānī nū, de sáhá ndá dē tiñu jā cúcanoō nū. Chi sī yáji dē jíhi dē, sochi nduú sáhá dē cuenta nāsa cajī incā nchivī, chi maá dē-ni ndíhvī inī dē cajī vāha dē. De jā stívī ndasí ndá dē, de cúu ndá dē tá cúu vīcō yíchí jā stéchí tāchī. De suni cúu dē tá cúu ñutun jāá nduú jéhe ndihā. De cúu dē tá cúu ñutun jā ní nquee jondē jín yoho, de nduú nā modo cuitī cā jā nene numa.

¹³De tá cúu nūū jísō ndute mar de quēnda tiñū, súcuán cúu ndá dē jín tiñu néhén jā cúu tūhun canoō. De cúu dē tá cúu tiūūn jā ní nsana ichi. De ja íyó tūha nūū neē ndasí nūū cundeē ndá dē níí cání.

¹⁴De nūū ní nchāha iñū tatā Adán, de nī ncacu Enoc, de nī nacani dē tūhun jā ní stéhén Yāa Dios nūū dē sīquī ndá tēe yáhá, ncachī dē: Maá Jētohō ō nī stéhén yā nūū nī jā iin quīvi de quiji yā jín cuāhā mil ángel yā.

¹⁵De sáhá ndā yā tiñu ndācá nchivī, de stānū tāhvī yā ndá nchivī néhén. Chi cúsa maá tiñu néhén sáhá ji sīquī jā cánéhén maá ji, de cāhān ji cuāhā tūhun nāvāha sīquī yā. Ncachī Enoc.

¹⁶Ndācá tēe yáhá chi maá-ni jā cāhān sōó dē de cāhān dē sīquī nchivī. De maá-ni jā cúsi inī ndá máá dē cúu jā ndúcú dē. De cāhān dē jā tēe téyí cúu dē, de cāhān yíñúhún dē jín nchivī tácuā nīhīn dē jacū nūū ji.

JUDAS

Jā sndíhvī inī Judas nchivī cándíja

17 Sochi ndá máá nú, ñanī mánī, nūcūhun inī nū ndá tūhun jā ja nī nacani ndá apóstol maá Jētohō ō Jesucristo.

18 Chi nī ncāhān ndá dē: Tá cuāndihi quīvī de quiji ndá tēe jā cuācū catá sīquī tūhun ndāā yā, de sāhá dē ndācá tiñu néhén jā ndíyo inī maá dē. Súcuán ncachī tūhun ndá apóstol.

19 Ndá tēe yáhá cúu jā sáhá sín nchivī. De maá-ni jā ndíhvī inī dē ndācá jā cútíndí inī maá dē, chi nduú íyó Espíritu yā jín dē.

20 Sochi ndá máá nú ñanī mánī, cuja vāha inī nū jín ndá tūhun ndoo ndasí jā cándíja nú. De cācān táhvī nū jín fuerza Espíritu Santo.

21 De quendō nihin nú jín tūhun jā cúndáhvī inī Yāā Dios ndá nú. De cundetu nú quīvī jā cutecū nū nī cání sáhá maá Jētohō ō Jesucristo sīquī jā cúndáhvī inī yā ndá nú.

22 De sava nchivī jā jáni síquí inī, nducú ndá nú modo scándíja nú ji.

23 De nducú ndéé nú jā cācu ji nūū cuāchi ji, chi modo jā stáá nú ji nūū ñúhūn. De sava cā ji chi cundáhvī inī nū ji scācu nú ji, de mā quétahān cuitī inī ndá nú cuāchi ji, chi cuquini inī nū jondē sahma ji jā ní ncutéhén jín tiñu néhén jā sáhá ndá ji.

Tūhun jā cúñáhnú Yāā Dios nī cání

24 De Yāā Dios chi mátúhún-ni maá yā cúu Yāā ndíchí, Yāā scācu yóhó. De íyó poder yā jā coto yā ndá ndóhó jā má quívi nú cuāchi, jín jā sáhá yā jā cuiñi ndá nú nūū yā nūū vii ndasí cúñáhnú yā, de quīvī ñúcuán de coo ndoo ndá nú nūū yā, de cusiī ndasí inī nū sáhá yā.

25 De ná cáhān ō jā vii ndasí cúñáhnú yā sīquī jā ní nsáhá yā jā jín Jētohō ō Jesucristo. De ná cáhān ō jā cúñáhnú ndasí yā, de ndācu yā tiñu jín poder jā ndíso yā jondē janahān ndasí jín jondē mitan jín jondē nī cání. Súcuán ná cóo. Amén.